

Naqqiut

Akissuteqaat 23.01.2026 taarserpaa

(Makku naqqiutigineqarput; Oqallisissiasatut siunnersuusiortup aqqa aammalu ulloq)

Ersinngitsumik innarluutillit atugaat pitsanngorsarniarlugit innersuussutaasut qanoq piviusunngortinneqarsinnaaneri pillugu Inatsisartunut apeqquteqaat aallaavigalugu oqallisissiasatut siunnersuut.

(Inatsisartunut ilaasortaq Bentiaraq Ottosen, Atassut)

Akissuteqaat

(Peqqissutsimut Inunnullu Innarluutilinnut Naalakkersuisoq)

Inatsisartunut ilaasortaq Bentiaraq Ottosen, Atassummeersoq, inuit ersinngitsumik innarluutillit atugaat pitsanngorsarniarlugit innersuussutaasut qanoq piviusunngortinneqarsinnaaneri pillugu oqallisissiasatut siunnersuuteqarneranut qutsavigaara.

Suliassaqarfimmi nukittorsaanerunissaq suliassaqarfiup immikkoortortaqaarfiisa akornanni ataqatigiissaarilluarnerunissaq suli pisariaqartoq, siunnersuuteqartup ukkataraa.

Tarnikkut nappaatillit timikkullu nappaatillit inuiaqatigiinni naligiissumik akuersaarneqassasut, inuillu innarluutillit inuiaqatigiinni peqataatinneqarnerunissaannut aaqqiissuteqarnissaq immikkut sulissutigineqassasoq, naalakkersuisoqatigiit 2025-mi isumaqatigiissutaanni allassimavoq. Matumani politikikkut anguniakkat inunnut ersinngitsumik innarluutilinnut tunngasuni sulinermi qitiupput, pisariaqartitaammi takussaangitsuugajummata tapersersorneqarnissaat paasineqarnissaallu pingaaruteqarpoq.

Inuit ersinngitsumik innarluutillit atugaat pitsanngorsarniarlugit ilaatigut Tiliumit innersuussutaasut tamakkiisuunngitsumik piviusunngortinneqarsimasut, Naalakkersuisut maluginiarpaat. Inuit ersinngitsumik innarluutillit qasserpiaanerisa atukkatigullu qanorpiaq inissisimanerisa erseqqissarnerusinnaaqullugu pitsaanerusumik aaqqissuullugaanerusumillu ilisimatusarfigineqarnerusariaqarput. Tamatuma saniatigut Peqqinnissaqarfimmut, kommunit, ilinniartitaanermut suliffissaqartitsiniarnermullu tunngasutigut ataqatigiissaarilluarnerunissaq pisariaqarlunilu inersimasunut sullissinerup 25-liisimangitsunuinnaq atuunnani 25-lereersimasunullu aamma atuunnissaa pingaaruteqarpoq.

Tusilartunit, kommunit inunnik innarluutilinnut sullissiviineersunit, Tiliumeersunit, Pissassarfimmeersunit allanillu matumani suliassaqarfimmut attuumassutilinneersunit peqataaffigineqartumik tusilartunik 2025-mi isumasioqatigiisitsisoqarpoq. Tusilartut attaveqatigiinnermut, tikikkuminartuunermet tapersersorneqarnermullu tunngasutigut ilungersuasartut isumasioqatigiinneranni paasinarsivoq. Tusilartut amerlasuut siussarissut tusilartut pillugit ilisimasakinnerannik pigiliutiinnakkaminnillu isumaqartarnerannik pissuteqartumik tunullinneqartutut misigisimasartut isumasioqatigiinneranni erserluinnarpoq.

Tusilartut pisariaqartitaat tassaaginnarpoq, innarluuteqarnertik pillugu ersinngitsumik innarluutilippaat allat assigalugit paasineqarnerunissartik inuiaqatigiinnilu peqataatinneqarnerunissartik.

Inuttaasut ersinngitsumik innarluutillit inuiaqatigiinni akuutinneqarnerunissaat paasineqarnerunissaallu Naalakkersuisut sulissutigerusuppaat. Tamanna Naalakkersuisoqatigiit peqataatitsinissamik periarfissatigullu naligiisitsinissamik isumaqatigiissutiminni ukkataqarnerannut

naapertuuttunik pisortat suliffiutaasa ikiuunnerunissaannut toqqissisimanarnerunissaannullu suliniutaasinnaasunik misissuinertaqarpoq.

Inunnut ersinngitsumik innarluutilinnut periarfissatigut, atukkatigut, peqataatitsinikkut nammineersinnaassutsikkullu assigiinngisitsisoqarunnaarnissaa sulissutigineqarnerusariaqartutut Naalackersuisut ataatsimoorlutik nalilerpaat. Innersuussutaasut piviusunngortinneqarsinnaaqullugit tamanna kommunit, peqatigiiffiit, Tilioq allallu soqutigisaqaqatigiit qanimut suleqatiginerisigut pissaaq.

Naalackersuisut matumani oqaaseqaatit tunngavigalugit inersuarmit oqalliseqataanissaminnut qilanaarput.